



BUPATI BULELENG

**Pidarta Ri Sajroning Karya Agung Mamungkah Mupuk
Pedagingan, Ngenteg Linggih, Macaru Balik Sumpah,
Piodalan Ageng III Mapeselangan Lan Mapedanan Ring
Pura Agung Jagatnata Buleleng.**

Nuju Rahina : Redite, 3 Juli 2023

Galah : 18.00 WITA

Genah : Ring Pura Agung Jagatnatha Buleleng

Om Swastyastu,

- Ida Sulinggih, sane pisinggihang titiang.
- Ida dane para Pinandita sane wangiing titiang.
- Bapak Sekda Kabupaten Buleleng sane mustikayang titiang
- Dane Asisten Kabupaten Buleleng sane mustikayang titiang
- Dane Menggala DPRD Kabupaten Buleleng sane taler mustikayang titiang

- Dane Menggala PHDI lan WHDI Kabupeten Buleleng sane kusumayang titiang
- Dane Menggala Kantor Kementrian Agama Kabupaten Buleleng sane kusumayang titiang
- Dane Manggala OPD Kabupaten Buleleng sane taler kusumayang titiang.
- Dane Para Kelian Tempekan sane kusumayang titiang
- Dane Prawartaka Upacara Piodalan Pura Agung Jagatnata sane kusumayang titiang, pamekas para Teruna Pasaren lan para Uleman sami sane tresna asihin titiang.

Maka purwakaning atur titiang, ngiring sareng sami mangastungkara malarapan puja stuti majeng ring Ida SangHyang Widhi Wasa, pamekas ring Ida Sanghyang Trayo Dasa Saksi maka saksining jagat, riantukan Ida Parama ledang maicayang kerahajengan miwah kerahayuan, gumanti prasida Ida dane iring titiang iriki masadu wadana, gumanti pacang sinarengan ngupasaksi pamargin upacara pujawali sane katur ring prahyangan

druwene iriki sane kemargiang ring rahina subha dewasa sekadi mangkin.

Angayu bagia pisan manah titiang, saha tan lali titiang ngaturang parama suksmaning idep ring ida dane sareng sami, sane sampun yukti – yukti mautsaha nabdab parikrama pamargin upacara upakara sane Ida dane gelarang jantos prasida labda karya antar tur nulus.

Ida dane sareng sami sane wangiing titiang.

Manawi ida dane para krama sareng sami sampun sami tatas pawikan ngeninin indik parhyangan druwene iriki marupa kahyangan maka pangastiti Ida Bhataara Sasuhunan sane katunasin amerta miwah kasukertan Jagat Sekala miwah Niskala sane kasembah bhaktinin melarapan antuk manah tulus lan lascarya.

Riantukan asapunika kawentenan parhyangan druwene iriki patut pisan ajegang tur lestariang maka warisan Sang Rumaga putusing Jnana duk nguni jantos mangkin, bilih-bilih mangda prasida sekala niskala keajegang tur kacihnayang minakadi tatujon pamuntat

agama druwene inggih punika “**Moksartham Jagadhita Ya Ca Itti Dharma**” pastika pacang kaapti.

Riantukan asapunika tetujon upacara Karya Agung Mamungkah Mupuk Pedagingan, Ngenteg Linggih, Macaru Balik Sumpah, Piodalan Ageng III Mapeselangan Lan Mapedanan Ring Pura Agung Jagatnata sane kamargiang rahinane mangkin ingggih punika maka pangurip, panyucian lan pujawali Ida Bhatara sasuhunan sane matatingan utama, ngelantur Ida kauntap antuk upacara upakara satwika yadnya ngelantur Ida kalinggayang saha ngajegin upacara druwene mangda Ida dane sareng sami lan sarwa prani nemuang kerahayuan, keheningan miwah kasukerthan Bhuana Agung lan Bhuana Alit, manut rahina patirtan Ida sane sampun kapastikayang.

Ida dane sareng sami sane kusumayang titiang

Inggih wantah asapunika atur pamidartan titiang sane prasida uningayang titiang diwawu, dumogi napi luwir sane uningayang titiang prasida mapikenoh ring sajroning hredaya.

Ngelantur sangkaning Asung Kerta Wara Nugraha
Ida Hyang Widi Wasa, mogi – mogi parikrama upacara
upakara sane kemargiang ring rahinane mangkin labda
karya sidhaning don maka piranti ngupadi santhi lan
kasukertan jagadhita.

Puput Suksma

OM, Santih, Santih, Santih, OM.

PJ BUPATI BULELENG,

Ir. I Ketut Lihadnyana, M.M.A